

卯


亥

卯

藏

江蘇古籍出版社

春秋集傳
二



春秋集傳
二

江蘇古籍出版社

春秋卷第九

張洽集傳

僖公



八年春王正月公會于齊侯宋公衛侯許男曹伯陳苴款盟于洮

公羊傳王者何微者也曷為序乎諸侯之先王命也

胡氏傳王人下士也內臣

之微者莫微於下士外臣之貴者莫貴於方伯公侯今以下士之微序乎方伯公侯之上外輕內重不亦偏乎春秋之法內臣以私事出朝者直書曰來以私好出聘者不稱其使以私情出許者止錄其名不以其貴故尊之也以王命行者雖下士之微序乎方伯公侯之上不以其賤故輕之也然則班列之高下不在乎內外特係乎王命爾聖人之情見矣。穀梁傳兵車之

會也。纂例啖子曰王人與盟非禮也。杜預注曹地

鄭伯乞盟

左氏傳鄭伯乞盟請服也

孔氏疏云鄭伯使子華聽命心猶未服齊桓拒子華之請今始服從桓公

以其新服尚未與之會故不得序而乞盟彼既請服義無不受當是既盟之後別與之盟也

○胡氏傳乞者

卑讓自屈之辭欲與是盟而未知其得與否也始而逃歸今則乞盟於以見舉動人君之大節不可不謹也

夏狄伐晉

襄陵許氏曰晉恃疆大且遠不與齊合是以狄得侮之與故當齊桓之隆同盟者安介立者殆矣

秋七月禘于大廟用致夫人

胡氏傳按禮大禘升歌清廟下而管象朱干玉戚以舞

大武八佾以舞大夏此天子之禮樂也踐其位則行其禮奏其樂故雖禘太祖周頌也而其詩曰相維辟公天子穆穆周公人臣不踐其位魯侯國而用天子之禮亂名犯分莫大乎此故夫子志之曰郊社之禮所以事上帝也宗廟之禮所以祀乎其先也魯侯國而以王禮祀大廟是誣僞不誠而非所以祀乎其先也故夫子傷之曰禘自既灌而往者吾不欲觀之矣夫灌以降神乃祭之始而已不欲觀是自始至終皆非禮矣○陸氏纂例此譏禘又譏致也○穀梁傳用者不宜用者也致者不

宜致者也言夫人必以其氏姓言夫人而不以氏姓非
 夫人也立妾之辭也劉向曰夫人成風也致之於大廟立以爲夫人非正也夫
 者正嫡之稱謂非崇妾之嘉號以妾體君則上下無別欲尊其母實卑其父故曰非正也○孫氏曰
 夫人成風不言風氏者成風僖公妾母嫁非廟見不得
 與祭僖公既君欲尊其母故因此秋禘用夫人之禮致
 于大廟使之與祭也妾母稱夫人僭之大者故不言風
 氏以貶之按文姜孫子齊貶去姜氏此不言風氏其貶
 可知也○劉氏意林曰春秋雖亂世未有妾母稱夫人
 者也自成風始矣此禮之所由失教之所由廢上下之

所由亂嫡庶之所由爭其惡乃至乎無父無君何以言之耶已之母父之妾也今背死而使之妃此所謂知母而不知父故曰無父凡立小君嫡子夫子命之者也今以其私親而建之非有天子之命也故曰無君無父無君者王法之所禁也而天子不能正是王無天也故召伯來會葬榮叔來含皆以王之無天爲譏也○胡氏傳初成風聞季友之繇遂事之而屬僖公焉故季友立之公賜季友汶陽之田及費又生而命之氏俾世其卿而私門強矣於成風則舉大事於始祖之廟立以爲夫人

而嫡妻亂矣以私勞寵其臣而卑公室以私恩崇其母而輕宗廟皆越禮之罪也

冬十有一月丁未天王崩

何氏曰惠王也○師氏曰不書葬魯不會葬故也

九年春王三月丁丑宋公御說卒

公穀御作禦

左氏傳春宋桓公卒

夏公會宰周公齊侯宋子衛侯鄭伯許男曹伯于葵丘

左氏傳會于葵丘尋盟且修好也王使宰孔賜齊侯胙

○杜氏注葵丘宋地周公宰孔也宰官周采地天子三

公陳留外黃縣有蔡丘○公羊傳宰周公者何天子之

爲政者也

穀梁傳天子之宰通于四海○胡氏曰宰天官冢宰兼爲三公者○胡氏曰古者三公無

其人則以六卿之有道者上兼師保之任冢宰或闕亦以三公下行端揆之職禹自司空進宅百揆又曰作朕股肱耳目是以宰臣上兼師保之任也周公爲師又曰位冢宰正百工是以三公行端揆之職也所以然者三公與王坐而論道固難其人而冢宰揆百官均四海亦不易處也○程氏傳天子之宰

與世子禮異

胡氏曰夫以冢宰兼三公其職任重矣而不殊會之何也人臣則有進退之節出入

均勞之義非王世子實有常尊之可比矣

○穀梁傳宋其稱子何也未葬之

辭也禮極在堂上孤無外事今背殯而出會以宋子爲

無哀矣

劉氏傳君薨百官總已以聽冢宰三年正也不能三年者其以凶礼行則稱子其以嘉礼行則

稱爵以嘉礼行者非也以凶禮行者亦非也君子不奪人之親人亦不可奪親也○微旨趙氏曰在喪而出或稱子或稱爵志惡之深淺也

秋七月乙酉伯姬卒

穀梁曰內女也○公羊傳未適人何以卒許嫁矣婦人

許嫁字而笄之死則以成人之喪治之

不以殤礼降也

九月戊辰諸侯盟于葵丘

孟子曰五霸桓公爲盛葵丘之會諸侯束牲載書而不

歃血

穀梁曰葵丘之會陳牲而不殺讀書加于牲上壹明天子之禁

初命曰誅不孝無

易樹子無以妾爲妻再命曰尊賢育才以彰有德三命曰

敬老慈幼無忘賓旅四命曰士無世官官事無攝取士
必得無專殺大夫五命曰無曲防無遏糴無有封而不
告曰凡我同盟之人既盟之後言歸于好○左氏傳秋
齊侯盟諸侯于葵丘宰孔先歸遇晉侯曰可無會也齊
侯不務德而勤遠略故北伐山戎南伐楚西爲此會也
東略之不知西則否矣其在亂乎君務靖亂無勤於行
晉侯乃還○程氏傳諸侯盟見宰不預陸氏微旨曰
淳聞於師曰
盟稱諸侯者前目而後凡之義且明周
公之不與盟禮也天子無疑諸侯之理○劉氏傳此一
地也曷爲再言葵丘善是盟也曷爲善之桓公之五命

以是爲盡禁矣諸侯咸諭乎桓之志蓋東牲載書而不

軟血也

胡氏曰觀孟子初命之辭則知桓公翼戴襄王之實信矣○公羊曰貫澤之會桓公有憂中國

之心不召而至者江人黃人也葵丘之會桓公震而矜之叛者九國

甲戌晉侯倭諸卒冬晉里克殺其君之子奚齊

甲戌左氏穀梁作甲

子危公穀作詭殺公羊作弑

左氏傳九月晉獻公卒里克丕鄭欲納文公故以三公

子之徒作亂初獻公使荀息傅奚齊公疾召之曰以是藐諸孤辱在大夫其若之何稽首而對曰臣竭其股肱之力加之以忠貞其濟君之靈也不濟則以死繼之冬

十月里克殺奚齊次書曰殺其君之子未葬也荀息

將死之人曰不如立卓子而輔之荀息立公子卓以葬

○穀梁傳其君之子云者國人不子也國人不子何也

不正其殺申生而立之也孫氏曰奚齊未踰年之君也其言里克殺其君之子奚齊

者奚齊庶孽其母嬖獻公殺世子申生以立之春秋不與故曰晉里克殺其君之子奚齊以惡之也○胡氏傳

人君者擅一國之名寵為其所子則子矣國人何為不子也民至愚而神是非好惡靡不明且公也其所子而

弗子者莫能使人弗之子也非所子而子之者莫能使人之亦子也周幽王嘗黜大子宜四子伯服矣而犬戎

殺其身晉獻公亦殺世子申生立奚齊矣而大臣殺其子詩不云乎天生烝民有物有則民之秉彜好是懿德

此言天理根於人心雖以私欲滅之而有不可滅也春秋書此以明獻公之罪抑人欲之私示天理之公為後

世戒其義大矣以此防民猶有欲易大子而立趙王如意致夫人爲人彘者○謝氏曰晉獻公以嬖寵殺申生立奚齊國人皆不欲立故里克殺之里克固有罪矣稱君之子又以罪獻公之惑於嬖孔子曰唯女子與小人爲難養也近之則不孫遠之則怨若內惑女子外昵小人天下紀綱安得而不壞哉

十年春王正月公如齊

孫氏曰公始朝齊也不至者朝桓安之與他國異也十

五年如齊同此

趙氏曰凡內朝聘稱如以異外周之制朝聘也有數今春秋畢書之見如京師

之簡也所以傷王室之微著諸侯之不臣也

狄滅溫溫子奔衛

左氏傳狄滅溫蘇子無信也蘇子叛王即狄又不能於

狄狄人伐之王不救故滅○杜氏注蓋中國之狄滅而居其地○余氏曰八年狄伐晉今又滅溫桓不能救也故溫子出奔不名以國小力弱不克有支故恕之而臯齊侯

晉里克殺其君卓及其大夫荀息

卓公羊作卓子

左氏傳十一月里克殺公子卓于朝

權衡曰去年十一月里克殺卓子此

亦据夏正十一月即周正月矣采獲兩書誤其前後耳杜氏云從起非也

荀息死之君子曰

詩所謂白圭之玷尚可磨也斯言之玷不可爲也荀息

有焉○胡氏傳國人不君奚齊卓而曰里克弑其君卓

何也是里克之君之也克者世子申生之傳也驪姬將殺世子而難里克優施飲之酒而告之以其故里克聽其謀乃欲以中立自免稱疾不朝居三旬而難作是謂持祿容身速獻公殺適立庶之禍者故成其君臣之名以正其弑逆之罪克雖欲辭而不受其可得乎使克明於大臣之義據經庭諍以動其君執節不貳固大子以攜其黨多爲之故以變其志其濟國之福也其不濟而死於其職亦無歉矣人臣所明者義於功不貴幸而成所立者節於死不貴幸而免克欲以中立祈免自謂智

矣而終亦不能免等死耳不死於世子而死於弑君其
亦不知命之蔽哉語曰不知命無以爲君子爲人臣而
不知春秋之義者必陷篡弑之罪克之謂矣劉氏意林曰里克能
不聽優施之謀竊喜能不從孫林父之辭陳乞能不隨
景公之惑則晉無殺世子之禍衛無逐君之惡齊无璧
華之變矣患皆在媮合苟容逢君之惡故春秋成其君
臣之名正其篡弑之罪也所謂不知其義被之空言不
敢辨矣不然卓與酈茶豈有宜爲君之義哉陳平之
王呂氏誅少帝也似此皆不明於大臣之分者也○

公羊傳及者何累也弑君多矣今此無累者乎曰有孔
父仇牧皆累也舍孔父仇牧無累者乎曰有有則此何
以書賢也何賢乎荀息荀息可謂不食言矣其不食言